

Modo é ten di verbo



L'EUNDICATIF

LO FUTUR

L'idoù di futur se ren normalemente avouì lo prézèn de l'eundicatif se chouivì de l'averbo *pi* (*pouì, poué, etc.*).

Ex. : *Dze vou-pi*
te va-pi
llu va-pi
no allen-pi
vo alléde-pi
leur van-pi

De sé an pouza no allen-pi i mitcho. (Aymavilles)

NOTA BENE

L'averbo *pi* (*poué - pouì...*) pou chouire d'atre verbo deun d'atre ten sensa baillì l'idoù di futur.

Ex. : *T'i-pi fran sayo.* (Aymavilles)

Lo futur, comme l'è reustó prézentou deun le tabló de conjuguezón, l'è surtoù eumpléyà pe esprimé an probabilitou ou bièn eun soué.

Ex. : *Demàn farè cheur bontèn.*
Veundrè beun si dzor que... (Aymavilles)

LO PASSOÙ SEUMPLO É LO PASSOÙ ANTERIEUR

Deun le tabló de conjuguezón se troue pa lo passoù seumplo é lo passoù antérieur : pe esprimì l'idoù d'eunna achón feniya di tot s'eumplèye lo partisipe passoù. De cou, eungn eumplèye étó lo passoù surcompozou que se ren avouì lo passoù compozou de l'ozilière avèi + lo partisipe passoù di verbo.

Ex. : *N'i àù vitto fé*
T'o àù vitto fé
L'at àù vitto fé
etc...

Atò la focheuze noua l'at àù vitto fé a séyé totta la toulà. (Aymavilles)

Modo é ten di verbo



LO SUBJONTIF

Eun remarque que lo subjontif prézèn l'è todzor mouèn eumpléyà mimo deun le ca iaou la concordanse di ten lo dimanderiye. L'è adón ramplachà pe lo subjontif eumparfé. Le doe fraze seu dézò, l'an lo mimo sans.

Dze vouì que te vegnèye avouì mé
Dze vouì que te vegnisse avouì mé (Aymavilles)

Deun caque patoué eun retrouve pa de cas d'eumplouà di subjontif prézèn (vére conjuguezón di verbo avèi).

OSSERVACHON

Deun sertèin-e fourme verbale, la plase de l'assàn toneucco l'è pa fichaye.

Ex. : *Sè n'issan/issàn cru la mamma...*

N'issan/issàn bén gagnà la partia... (Nus)

- Deun caque variétoù de patoué, n'at eungn idantitoù fourmella euntre la premiye é la seunquima persona. So se produèi a l'eumparfé é i futur de l'eundicatif, i condechonel é i subjontif.

Ex. : *Dze ristao eun Veulla*
Vo ristao eun Veulla (Aymavilles)

De sari coudzi dè vendre
Vo sari coudzi dè vendre (Verrayes)

Dze lamerio partì demàn
Vo lamerio partì demàn (Aymavilles)

I voudrà què de fièyo atenchón
I voudrà què vo fièyo atenchón (Verrayes).